

T 5299 / 1333

13

CHINESE - JAPANESE LIBRARY
HARVARD - YENCHING INSTITUTE
AT HARVARD UNIVERSITY

SEP 19 1947



目錄

蕭山張遠題詞著

唐德中歸成都草堂嚴武表授節度參謀作

將赴成都草堂春歸歸來草堂四松

水檻破船過南時登樓幸寄高常

侍寄印州崔錄事玉銀事許寄草堂貴

歸雁題句寄司馬山人贈王侍御

故斛斯校書莊黃河揚旗太子張舍人

遠遊取海段游背別唐十五誠

目錄

蕭山張 遠邇可著

廣德中歸成都草堂嚴武表授節度叅謀作

將赴成都草堂 春歸 歸來 草堂 四松

水檻 破船 過南隣 登樓 奉寄高常

侍 寄邛州崔錄事 王錄事許脩草堂貲

歸雁 絕句 寄司馬山人 贈王侍御 過

故斛斯校書莊 黃河 揚旗 太子張舍人

遺織成褥段 憶昔 別唐十五誠 寄董卿

嘉榮 立秋雨院中有作 奉和嚴鄭公軍城

早秋 軍城早秋 院中晚晴 到村 村雨

宿府 遣悶奉呈嚴公 送舍弟穎 嚴鄭

公堦下新松 嚴鄭公宅 晚秋陪嚴鄭公

奉觀嚴鄭公廳事岷山沱江圖 初冬 觀李

固山水圖 至後 懷舊 哭台州司戶 正

月三日 獨坐 敝廬遣興 營屋 除草

春日江村 春遠 絕句 絕句 絕句 喜

雨 天邊行 莫相疑行 赤霄行 三韻

杜詩會粹

塔佛大學漢和
圖書館珍藏

仁和丁葯園先生定

慈水姜宸英西溟叅

蕭山張 遠邇可著

將赴成都草堂途中有作先寄嚴鄭公五首

唐書嚴武傳寶應元年自成都名還拜京兆尹明年為二聖山陵橋道使封鄭國公黃門侍郎廣德二年復節度劍南

得歸茅屋赴成都直為文翁再剖符但使閭閻還揖讓敢論松竹久荒蕪魚知丙穴由來美酒憶郫筒不

用○沽○五○馬○舊○曾○諳○小○徑○幾○回○書○扎○待○潛○夫○郫音皮○漢文帝紀

初與太守為銅虎符竹使符陸雲贈鄱陽使君詩謁帝東堂剖符南征戴逵閒遊贊寄心松竹取樂魚

鳥蜀都賦嘉魚出于丙穴劉淵林曰丙穴在漢中沔陽縣北有魚穴二所黃曰丙穴固在漢中然地志

邛州大邑縣有嘉魚穴萬州梁山縣柏枝山有丙穴方數丈出嘉魚此赴成都作意是指邛州丙穴蓋成

都西南至邛州才百五十里耳成都記成都府西五十里因水標名曰郫縣以竹筒盛美酒號為郫筒

華陽風俗錄郫縣有郫筒池池旁有大竹郫人剝其節傾春釀于筒苞以藕絲蔽以蕉葉信宿香達于林

外然後斷之以獻俗號郫筒酒後王符傳符著書號潛夫論○此首總起先說將赴成都心事揖讓

頂文翁松竹頂草堂處處清江帶白蘋故園猶得見殘春雪山斥候無兵

馬○錦○里○逢○迎○有○主○人○休○怪○兒○童○延○俗○客○不○教○鵝○鴨○惱○

比○隣○習○池○未○覺○風○流○盡○况○復○荆○州○賞○更○新○此首途中預計也主人指鄭公公詩一飯不曾延俗客今出外已久一旦

來歸即俗客有相問相親之意所以不怪其延也公詩鵝鴨宜長數正恐惱比隣也武嘗訪公草堂故末以山簡習池擬之

竹○寒○沙○碧○浣○花○溪○橋○刺○藤○梢○咫○尺○逃○過○客○徑○須○愁○出○

入○居○人○不○自○解○東○西○書○籤○藥○裹○封○蛛○網○野○店○山○橋○送○

馬○蹄○肯○藉○荒○庭○春○草○色○先○拚○一○飲○醉○如○泥○逢萌傳萌隱瑯琊勞

山詔徵之託以老耄迷路東西不知方面所在漢戚外傳武發篋中有藥裹二枚張協詩蜘蛛網四

壁後漢周澤傳一歲三百六十一日三百五十九日齋注漢官儀此下云一日不齋醉如泥○此首言草

七
卷之十三
一

堂久蕪念其荒涼之景

常苦沙崩損藥欄也從江檻落風湍新松恨不高千

尺惡竹應須斬萬竿生理祇憑黃閣老衰顏欲付紫

金卅三年奔走空皮骨信有人間行路難蕭撝詩沙崩聞韻鼓

抱朴子金丹燒愈久變化愈妙令人不老不死雲笈七籤合丹法火至七十日藥成五色飛華紫雲

亂映名曰紫金其蓋上紫霜名曰神丹樂府有行路難○此與上首畧同而增自傷

錦官城西生事微烏皮几在還思歸昔去為憂亂兵

入今來已恐隣人非側身天地更懷古回首風塵甘

息機共說總戎雲鳥陣不妨游子芰荷衣高士傳晉宋明不仕

杜門註黃老孫登惠烏羔皮裘几謝朓咏烏皮隱几詩蟠木生附枝刻削豈無施取則龍文鼎三趾獻光

儀勿言素韋潔白沙尚推移曲躬奉微用聊承終宴疲公寄劉峽州詩憑几烏皮綻公蓋素所愛者故

思之不置亂兵指徐知道握奇經八陣天地風雲為四正飛龍翼虎鳥翔蛇蟠為四奇梁簡文七勵

迴雲鳥之密陣離騷製芰荷以為衣兮集芙蓉以為裳○總戎指嚴公游子公自謂言懷古息機誰可

依歸盡說惟公耳方是歸草堂之意方是五首總結語

春歸歸成都草堂

苔徑臨江竹茅簷覆地花別來頻甲子歸到忽春華

倚杖看孤石傾壺就淺沙遠鷗浮水靜輕燕受風斜

世路雖多梗吾生亦有涯此身醒復醉乘興即為家

蘇武詩努力愛春華 晉春秋謝安所居有石一株常倚杖相對 公故居尚在長安故曰乘輿即為家

歸來

客裏有所適。歸來知路難。開門野鼠走。散帙壁魚乾。洗杓開新醞。低頭著小冠。憑誰給麴蘖。細酌老江干。

有所適指往來梓閬 謝眺詩散帙問所知 爾雅蟬白魚注衣書中蟲一名蛎魚 漢書杜欽杜鄴並字子夏而欽盲人呼盲子夏欽因製小冠冠之由是謂欽為小冠子夏鄴為大冠子夏

草堂

昔我去草堂。蠻夷塞成都。今我歸草堂。成都適無虞。

書四方無虞 請陳初亂時反覆乃須臾大將赴朝廷 四句領起

羣小起異圖。中宵斬白馬。盟歎氣已麓。西取邛南兵。北斷劍閣隅。布衣數十人。亦擁專城居。其勢不兩大。始聞蕃漢殊。西卒却倒戈。賊臣互相誅。焉知肘腋禍。

自及梟鏡徒。義士皆痛憤。紀綱亂相踰。一國實三公。萬人欲為魚。唱和作威福。孰肯辨無辜。眼前列桎械。背後吹笙竽。談笑行殺戮。濺血滿長衢。到今用鉞地。風雨聞號呼。鬼妾與鬼馬。色悲充爾娛。國家法令在。

此又足驚訝。

大將二句謂嚴武入朝徐知道遂反

蘇秦傳會于涇水之上通質剗白馬而 穀梁傳齊桓公衣裳之會十一未嘗有歃血之盟 樂府羅敷行四十專城居 左傳物莫能兩大

〔書〕前途倒戈攻于後以北 〔晉書〕江統曰寇發心

腹禍起肘腋 〔漢書注〕梟鳥名食母破鏡獸名食父

黃帝欲絕其類使百吏祠皆用之 〔孫萬壽詩〕牛斗盛

妖氛梟獍已成群 〔左傳〕一國三公吾誰適從 〔項

羽紀〕今人方為刀俎吾為魚肉 〔梁武帝淨業賦〕威

福自由生殺在口 〔爾雅〕柎謂之柎械謂之柎 〔隋

書〕楊素為將臨敵求人過失而斬之多至百人流血

盈前談笑自若 〔左傳〕至于用鉞 〔趙曰〕鬼妾鬼馬

謂已殺其主如胡人以亡者之妻為鬼 賤子且奔走

妻之義 ○此段承明昔我去草堂句

三年望東吳。弧矢暗江海。難為游五湖。不忍竟舍此。

復來薙榛蕪。入門四松在。步屨萬竹疎。舊犬喜我歸。

低徊入衣裾。鄰里喜我歸。沽酒攜胡盧。大官喜我來。

遣騎問所須。城郭喜我來。賓客隘村墟。公去成都往來梓閬間凡

三年 〔虞翻曰〕太湖東通松江南通雲溪西通荆溪

北通滬溪東南通非溪凡五道別謂之五湖 薙徒

計切除草也 〔世說〕陸士衡初入洛詣劉道真劉性

嗜酒禮畢初無他言唯問東吳有長柄壺盧卿得種

來否 〔按〕胡盧以貯酒胡古與壺通 〔庾信詩〕壺盧一酒

樽 〔後村詩話〕子美草堂大官喜我來四韻其體蓋

用木蘭詩爺娘聞我來出郭相扶將阿姊聞妹來當

戶理紅粧小弟聞妹來磨刀霍霍向猪羊 ○此段承

明今我歸 天下尚未寧。健兒勝腐儒。飄飄風塵際。何

地置老夫。於時見疣贅。骨骸幸未枯。飲啄媿殘生。食

薇不敢餘。〔莊子〕彼以生為附贅懸疣 〔古詩〕食

蕨不願餘 ○此段又以感嘆作總結

〔錢箋〕寶應元年四月嚴武入朝七月劍南西川兵

馬使徐知道反八月伏誅公攜家避亂往梓州廣

德二年武鎮劍南公復還成都草堂此詩云大將

赴朝廷羣小起異圖謂武入朝而知道反也北斷

劍閣隅謂知道以兵守要害賊臣互相誅謂知道為其下李忠厚所殺〔朱長孺云〕徐知道乃兵馬使漢兵是其統領又脅誘羗夷共反繼而賊徒爭長羗兵不附李忠厚因而殺之故曰其勢不兩大始聞蕃漢殊西卒却倒戈賊臣互相誅也唱和威福一段當是李忠厚既殺知道縱兵殘害無辜如花敬定之事故曰國家法令在此又足驚吁也

四松

四松初移時大抵三尺強別來忽三歲離立如人長會看根不拔莫計枝凋傷幽色幸秀發疎柯亦昂藏所插小籬籬本亦有隄防終然振撥損得恹千葉黃

振直庚切○〔禮記〕離坐離立〔注〕兩相麗之謂離〔孔稚圭祭張長史文〕昂藏風領〔謝惠連祭古塚文〕以物

振撥之〔注〕南人以觸撥為振千葉黃木病則葉黃也○此段喜四松之存而隄防甚周敢為故

林主黎庶猶未康避賊今始歸春草滿空堂覽物嘆

衰謝及茲慰淒涼清風為我起灑面若微霜足以送

老姿聊待偃蓋張我生無根蒂配爾亦茫茫有情且

賦詩事迹可兩忘勿矜千載後慘澹蟠穹蒼〔陸機詩〕

灑面〔陶潛詩〕人生無根蒂飄如陌上塵○此段敘歸草堂情事以四松之有根而自惜其漂泊兼之歲月有盡而松之綿亘無期寄慨作結

水檻

蒼江多風飈雲雨晝夜飛茅軒駕巨浪焉得不低垂

遊子久在外。門戶無人持。高岸尚為谷。何傷浮柱欹。
 扶顛有勸誠。恐為識者嗤。既殊大厦傾。可以一木支。
 臨川視萬里。何必欄檻為。人生感故物。慷慨有餘悲。
庾信枯樹賦或低垂于霜露 [古樂府] 健婦持門戶
 亦勝一丈夫 [詩] 高岸為谷深谷為陵 [西京賦] 時
 游極于浮柱 [文中子] 大厦之傾非一木所支。此
 水檻為風雨所壞而作 [故物即水檻公夙所憑者
 拓一步
 作結

破船

生平江海心。宿昔具扁舟。豈惟青溪上。日傍柴門遊。
 蒼皇避亂兵。緬邈懷舊丘。鄰人亦已非。野竹獨脩脩。

船舷不重扣。埋沒已經秋。仰看西飛翼。下愧東逝流。
 故者或可掘。新者亦易求。所悲數奔竄。白屋難久留。

隱逸傳放情江海 [謝靈運詩] 緬邈區中綠 [晉書]
 夏統以足扣船而歌吳曲 [謝靈運山居賦] 卷扣舷
 之逸曲感江南之哀嘆扣作敏舷作弦 [幽明錄] 陽
 羨小吏吳龕乘掘頭船過溪。舊與新皆言船也語
 意言一舟亦或易辨故者可掘新者易求但所悲者
 奔竄未定則此船亦非可戀之物所以聽其破耳

過南隣朱山人水亭

相近竹參差。相過人不知。幽花欹滿樹。細水曲通池。
 歸客村非遠。殘樽席更移。看君多道氣。從此數追隨。

登樓

花○近○高○樓○傷○客○心○萬○方○多○難○此○登○臨○錦○江○春○色○來○天○
地○玉○壘○浮○雲○變○古○今○北○極○朝○廷○終○不○改○西○山○寇○盜○莫○

相○侵○可○憐○後○主○還○祠○廟○日○暮○聊○為○梁○父○吟陸機詩春芳傷客心

盧思道蜀國絃雲浮玉壘夕日暎錦城朝北極

西山從登臨遠望而言終不改即所謂廟貌依然鐘

簾無恙也吳曾漫錄蜀先主廟在成都錦官門外

西挾即武侯祠東挾即後主祠蔣公堂帥蜀以禪不能保有土宇始去之所謂後主還祠廟者書所見以

志慨也師尹曰梁父吟者傷時無諸葛之才愚謂公亦暗以自負耳

奉寄高常侍唐書百官志門下省左散騎常侍二人掌規諷過失侍從顧問

汶○上○相○逢○年○頗○多○飛○騰○無○那○故○人○何○總○戎○楚○蜀○應○全○

未○方○駕○曹○劉○不○啻○過○今○日○朝○廷○思○汲○黯○中○原○將○帥○憶○

廉○頗○天○涯○春○色○催○遲○暮○別○淚○遙○添○錦○水○波漢書汶水出泰山郡

萊蕪縣原山入涉汶上在齊南魯北公天寶四載與李白高適游齊趙境汶上相逢正此時也公

與適全為拾遺而適已為散騎常侍則其飛騰已極矣適先為淮南節度後為西川節度故曰總戎楚

蜀薛道衡詩朝端去總戎應全未謂未盡其功名絕交論道文麗藻方駕曹王鍾嶸詩評曹劉殆

文章之聖漢書汲黯在朝淮南寢謀○時高赴召而公在成都故有末句

寄邛州崔錄事

邛○州○崔○錄○事○聞○在○果○園○坊○久○待○無○消○息○終○朝○有○底○忙○

應愁江樹遠。怯見野亭荒。浩蕩風塵際。誰知酒熟香。
江樹野亭公草堂景色。酒熟公亦自矜所有耳。

王錄事許脩草堂。貴不到聊小詰。

為嗔王錄事。不寄草堂貲。昨屬愁春雨。能忘欲漏時。

歸雁

東來萬里客。亂定幾年開。腸斷江城雁。高高正北飛。

絕句二首

遲日江山麗。春風花草香。泥融飛燕子。沙暖睡鴛鴦。

四句對
截律

江碧鳥逾白。山青花欲然。今春看又過。何日是歸年。

庾信詩山
花焰欲燃

寄司馬山人十二韻

關內昔分袂。天邊今轉蓬。驅馳不可說。談笑偶然同。

驅馳承轉蓬。談笑承分袂。○四句總領起。道術曾留意。先生早擊蒙。家家

迎薊子。處處識壺公。長嘯峨眉北。潛行玉壘東。有時

騎猛虎。虛室使仙童。述異傳荀環好道術。潛棲却粒。易上九擊蒙。後漢方伎傳。

費長房為市吏。有賣藥老翁。懸一壺于肆。市罷輒跳入壺中。長房異之。因往再拜。同入此壺。洞冥記。東方朔出遇蒼虎。息于道旁。朔便騎虎而還。扞捶過痛。虎嚙之。脚傷。雲笈七籤。守玄丹。十八年詣上清宮。

受書佩符役使玉童玉女各十人。○此段敘山人承關內句。髮少何勞白。顏衰更

肯紅。望雲悲輶軻。畢景羨冲融。喪亂形仍役。淒涼信

不通。懸旌要路口。倚劍短亭中。求作殊方客。殘生一

老翁。相哀骨可換。亦遣馭清風。冲融指山人。史記蘇秦傳心搖搖如懸

旌而無所終薄。張協詩。羈旅無定心。翩翩如懸旌。宋玉大言。仗劍倚天外。六帖。十里一長亭。五里一

短亭。漢武內傳。一年易氣。二年易脉。四年易肉。五

年易髓。六年易筋。七年易骨。八年易髮。九年易形。莊子。列子御風而行。冷然善也。相哀句。言山人哀

而換之。○此段自敘。承天邊句。末語復挽。山人作結。截然不苟。

贈王二十四侍御契四十韻元結別王佐卿序。癸卯歲京兆

王契佐卿年四十六頃去西蜀對酒欲別

按王侍御當是罷官而居于蜀者故詩有子

去何瀟灑客即掛冠

至幸各對松筠等句

往往雖相見。飄飄愧此身。不關輕冕紱。但是避風塵。

四語泛敘一別星橋夜三移斗柄春敗亡非赤壁奔

在蜀之由走為黃巾子。去何瀟灑。余藏異隱淪。書成無過雁。衣

故有懸鶉。恐懼行裝數。伶俜臥疾頻。曉鷲工迸淚。秋

月解傷神。會面嗟鰲黑。含妻話苦辛。接輿還入楚。王

粲不歸秦。錦里殘丹竈。花溪得釣綸。消中祇自惜。晚

起索誰親。漢書秦李冰造七星橋上應七星光武謂

吳漢曰安軍宜在七星橋。公羊傳注斗

指東曰春公避徐知道之亂往來梓閬間三年方

歸成都荆州記蒲圻縣沿江一百里南岸名赤壁

昔周瑜破魏武處後漢書鉅鹿人張角所部有三

十六方皆着黃巾同日反叛子去何蕭洒去去官

也卽下掛冠意敗亡二句言我不因敗亡而未免

奔走道路者以避亂耳非好爲隱淪也陸厥詩雁

過南無書世說衣不經新何由而故荀子子夏

家貧衣若懸鶉屈原傳面色鰲黑後漢李通傳

素有消疾素問多食數溲日消中卽消渴也絕交

書臥喜晚起以上言在梓閬間未歸成都時之事

伏柱聞周史乘槎有漢臣鴛鴻不易狎龍虎未宜馴

客卽掛冠至交非傾蓋新由來意氣合直取性情真

浪跡同生死無心恥賤貧偶然存蔗芋幸各對松筠

王康琚詩老聃伏柱史乘槎言侍御在官日曾有

出使之事五君詠龍性誰能馴玩鴛鴻二句侍

御不合于時而引去者故接以掛冠云云後漢逢

萌傳王莽居攝萌解冠掛東都門而去鄒陽傳白

頭如新傾蓋如故蜀都賦瓜疇芋區其蔗辛薑

○以上言侍御到蜀之由公與交契之密如此

飯依他日窮愁怪此辰女長裁葛穩男大卷書勻

口江如練蠶崖雪似銀名園當翠巘野棹沒青蘋屢

喜王侯宅時邀江海人追隨不覺晚欵曲動彌旬但

使芝蘭秀何須棟宇隣山陽無俗物鄭驛正留賓出

入竝鞍馬光輝參席珍重遊先主廟更歷少城闈石

鏡通幽魄琴臺隱絳脣送終惟糞土結愛獨荆榛置

酒高林下觀碁積水濱區區其累趼稍稍息勞筋網

聚粘圓鯽絲繁煮細尊長歌敲柳瘦小睡凭藤輪農
月須知課田家敢忘勤浮生難去食良會惜清晨滿當

作棚通鄧切○南齊書張融與從弟永書云世業清
貧民生多待榛栗棗修女贄既長束帛禽鳥男禮已

大水經注李冰于都安縣堰江作棚棚有左右口
謂之湔棚江入郫江檢江以行舟寰宇記導江縣有

都安堰蜀人謂堰謂棚風賦風起于青蘋之末
任昉詩勞君款曲問冒此殷勤酬何遜詩彌旬苦

凌亂家語與善人居如入芝蘭之室陶潛詩歡
心孔洽棟宇惟隣此言使臭味相合不必接居隣

近漢書鄭當時字莊常置驛馬于長安諸郊請謝
賓客夜以繼日楊雄蜀都賦眺朱顏離絳唇送

終蒙石鏡結愛蒙琴臺莊子百舍重趼而不息
曹植詩我有柳癭瓢鮑照詩花蔓引藤輪○以上

公歸成列國兵戈暗今王德教淳要聞除狡獪休作
都之事

畫麒麟洗眼看輕薄虛懷任屈伸莫令膠漆地萬古

重雷陳爾雅獫狢類貙虎牙食人迅走淮南子堯之
時獫狢為民害休作亦公自謂言獫狢固

除之而我則無心麒麟之畫也但洗眼云云耳隋
煬帝詩宿霧洗開明媚眼張華詩末世多輕薄○

未段敘時事而
以友誼作結

過故斛斯校書莊二首

原注老儒艱難病于
庸蜀嘆其末後方授

官一

此老已云沒鄰人嗟未休竟無宣室名徒有茂陵求

妻子寄他食園林非昔遊空餘總帷在浙浙野風秋

漢書賈誼自長沙徵見文帝方受釐坐宣室問以鬼
神之本蘇林曰宣室未央前正室相如傳家居茂

陵病甚武帝使所忠往求其書至則相如已死問其妻得遺札書言封禪事謝朓詩茂陵將見求左傳民食于他○此首先序校書後點山莊

燕入非旁舍鷗歸祗故池斷橋無復板臥柳自生枝

遂有山陽作多慚鮑叔知素交零落盡白首淚雙垂

漢五行志上林苑中大柳樹斷什地一朝起立生枝葉王褒詩春柳卧生根晉書向秀經嵇康山陽舊居作思舊賦廣絕交論素交盡利交興○此首先敘山莊後敘交情

黃河二首

黃河北岸海西軍椎鼓鳴鐘天下聞鐵馬長鳴不知

數胡人高鼻動成羣晉中興書冉閔殺石鑿及諸胡于時高鼻多鬚者無不濫死

水經河水自于闐疏勒而東徑金城允吾縣北鄜道元云王莽之西海也莽納西零之獻以為西海郡唐時其城陷于吐蕃故此云海西軍○此詩為吐蕃而作

黃河西岸是吾蜀欲須供給家無粟願驅眾庶戴君

王混一車書棄金玉杜詩博議唐運道俱仰黃河獨蜀僻在西南河漕不通西山三

城糧運屢絕故有供給無粟之嘆此亦為吐蕃入寇而作

揚旗原注二年夏六月成都尹嚴公置酒公堂觀騎士試新旗幟

江風颯長夏府中有餘清我公會賓客肅肅有異聲

初筵閱軍裝羅列照廣庭庭空六馬入駃駃揚旗旌

駃布可切駃五可切何敬祖詩廣庭發暉素說文駃駃馬搖頭也甘泉賦崇丘陵之駃駃兮○此段

敘揚旗之由迴迴偃飛蓋。熠熠迸流星。來衝風颺急。去擘

山嶽傾。材歸俯身盡。妙取略地平。虹蜺就掌握。舒卷

隨人輕。劉楨詩迴迴目昏亂曹植詩飛蓋相追隨

石苞書旌旗流星曹植詩俯身散馬蹄

羽獵賦虹蜺為綴注綴旗上繫也江總陳宣帝

哀策文曳蛇旗之舒卷○此段實寫揚旗之妙備極

形三州陷犬戎。但見西嶺青。公來練猛士。欲奪天邊

城。此堂不易升。庸蜀日已寧。吾徒且加餐。休適蠻與

荆。柳芳唐曆廣德元年運糧絕吐蕃陷松維保三州

相如琴歌何悟今夕今升斯堂收誓及庸蜀

羗鬃十道志夔州古庸國王仲宣七哀詩復棄中

國去遠身適荆蠻○此段美嚴公結從揚旗拓一步

題之外象也

太子張舍人遺織成褥段

異物志大秦國以野繭絲織成毳毼以羣獸五色毛雜之為鳥獸人物草木雲氣千奇萬變唯意所作廣志毼毼白毼毛織之近出南海織毛褥也織成褥段殆此類

客從西北來。遺我細織成。開絨風濤湧。中有掉尾鯨。

透迤羅水族。瑣細不足名。客云充君褥。承君終宴榮。

空堂魍魎走。高枕形神清。細一作翠○古詩客從遠方來遺我一端綺廣雅

天竺出細織成江賦揚鬢掉尾謝朓詩透迤帶

淥水鮑照詩晨光被水族沈約烏皮几詩聊承

終宴疲○此段敘題已盡風濤四句領客珍重意顧

織紋之麗客云四句遺織成者之詞我非公卿留之懼不祥。施之混柴荆。服飾定尊卑。大

哉萬古程。今我一賤老。袒褐更無營。煌煌珠宮物。寢

處禍所嬰。楚詞紫貝闕兮珠宮。左傳譬之如禽獸。吾寢處之矣。此段公辭織成之意即左

傳服之不衷。嘆息當路子。干戈尚縱橫。掌握有權柄。

衣馬自肥輕。李鼎死岐陽。實以驕貴盈。來瑱賜自盡。

氣豪直阻兵。皆聞黃金多。坐見悔吝生。張敞傳海內之命斷于掌

握。舊唐書上元二年以羽林大將軍李鼎為鳳翔

尹典鳳隴等州節度使二年二月党項羌寇寶雞入

大散關陷鳳州鼎邀擊之六月以鼎為鄯州刺史隴

右節度使李鼎之死史鑑俱不載此云死岐陽蓋

未至隴右也。舊唐書寶應元年來瑱為山南東道

節度使裴茂表瑱倔強難制帝潛令茂圖之六月瑩

擒茂于申口入朝謝罪廣德元年正月貶播州尉翼

日賜死于鄆縣。薛道衡傳衡致美先朝帝曰此魚

藻之義也後令自盡。左傳州吁阻兵安忍。羊祜平

吳疏。今不于此平吳而更阻兵相守。庾僧淵詩悔

吝生有情。此段陡然發議極言侈

奢之禍正見非分之事不可于也。奈何田舍翁受

此厚貺情。錦鯨卷還客。始覺心和平。振我麤席塵。媿

客茹藜羹。宋武帝紀帝大修宮室袁顛盛稱高祖儉

素帝曰田舍翁得此已過矣。錦鯨應上

掉尾鯨。前嚴安傳心既和平其性恬安。莊子孔

子窮于陳蔡之間七日不食藜羹不糝。此段以織

成還客總

收全局。

憶昔二首

憶昔先王巡朔方。千乘萬騎入咸陽。陰山驕子汗血

馬。長驅東胡胡走藏。鄴城反覆不足怪。關中小兒壞

紀綱張后不樂上為忙。至今今上猶撥亂勞心焦思

補四方。先皇肅宗也。秦本紀西北斥逐匈奴自榆中並河以東屬之陰山徐廣曰陰山在五原

北驕子回紇東胡安慶緒也回紇助討賊收復西京慶緒奔河北保鄴郡史思明既降復叛救慶緒于鄴城故曰反覆關中小兒李輔國也舊唐書官

官傳李輔國閑廐馬家小兒少為閹貌陋粗知書計為僕事高力士通鑑注凡廐牧五坊禁苑給使者皆謂之小兒晉泰始謠賈裴王亂紀綱舊書后妃

傳張后寵遇專房與輔國持權禁中干預政事帝頗不悅無如之何上為忙極狀縱嬌之態傳玄樂

功之不成受誅乃勞身焦思史記夏本紀禹傷先人父鯀

我昔近侍叨奉引出兵整肅不可當為留猛士守未央

致使岐雍防西羌犬戎直來坐御床百官跣足隨

天王願見北地傅介子老儒不用尚書郎公時受拾遺故曰近

侍猛士謂郭子儀唐書寶應元年八月子儀自河南入朝程元振數譖之子儀請解副元帥節度使留

京師明年十月吐蕃大入寇括地志漢未央宮在長安故城中近西南隅岐雍唐鳳翔關內地舊書

吐蕃傳乾元後數年鳳翔之西邠州之北盡為蕃戎境新書吐蕃本西羌屬拜必手据地為犬號南史

侯景傳齊王宣夢獼猴坐御牀乃煮景妻子于鑊又大同中太醫令朱耽夢犬羊各一在御坐既而天子

蒙塵景登正殿焉梁武帝記諺云熒惑入南斗天子下殿走乃跣足下殿以禳之跣足隨天王謂代

宗幸陝漢書傳介子北地人也持節使樓蘭斬其王歸之北關詔封義陽侯木蘭行欲與木蘭賞不

用尚書郎公本傳上元二年冬黃門侍郎鄭國公嚴武鎮成都奏為節度叅謀檢校尚書工部員外郎

賜緋魚袋此段敘吐蕃陷京師代宗幸陝事

卷之十三 十六

憶昔開元全盛日。小邑猶藏萬家室。稻米流脂粟米
 白。公私倉廩俱豐實。九州道路無豺虎。遠行不勞吉
 日出。齊紈魯縞車班班。男耕女桑不相失。宮中聖人
 奏雲門。天下朋友皆膠漆。百餘年間未災變。叔孫禮
 樂蕭何律。蕪城賦當昔全盛之日萬家之室小邑猶藏見其戶口殷繁王融詩澄清九州
 牧道路無豺虎舊唐書開元季年頻歲豐稔京師米價斛不盈二百天下又安雖行萬里不持寸刃
 楚詞歷吉日兮吾將行漢地理志齊俗彌侈織作冰紈綺繡紀麗之物師古曰冰謂布帛之細色鮮潔如水也紈素也韓安國傳強弩之末力不能入魯
 縞後漢書桓帝時京師童謠曰車班班入河間河間姪女工數錢車班班言商賈不絕于道周禮
 大司樂歌大呂舞雲門以祀天神○此段極言開元

之盛。豈聞一絹直萬錢。有田種穀今流血。洛陽宮殿燒

焚盡。宗廟新除狐兔穴。傷心不忍問耆舊。復恐初從

亂離說。小臣魯鈍無所能。朝廷記憶蒙祿秩。周宣中

興望我王。灑血江漢身衰疾。顏之推詩狐兔穴宗廟

劉公幹詩小臣信魯鈍僂俛安能返蒙祿秩即授尚書郎也○此段敘吐蕃之亂句句與上相反而以中興作結

別唐十五誠因寄禮部賈侍郎舊唐書賈至傳寶應二年

為尚書左丞廣德二年轉禮部侍郎 舊書

廣德二年九月尚書左丞楊綰知東京選禮部侍郎賈至知東京舉兩都分舉選自至始

○時唐十五必往東都赴舉公故寄以詩為之先容也

九載一相見。百年能幾何。復為萬里別。送子山之阿。

白鶴久同林。潛魚本同河。未知棲集期。衰老強高歌。

歌罷兩悽惻。六龍忽蹉跎。相視髮皓白。况難駐羲和。

詩有鶴在林陸機詩出自幽谷及爾同林宋玉舞賦抗音高歌為樂之方阮藉詩白日忽蹉跎○此

段敘胡星墜燕地。漢將仍橫戈。蕭條四海內。人少豺

虎多。少人慎莫投。多虎信所過。饑有易子食。獸猶畏

虞羅。子負經濟才。天門鬱嵯峨。飄飄適東周。來往若

崩波。胡星謂史朝義唐書廣德元年正月朝義縊死于幽州醫問祠下傳首京師漢將謂僕固懷

恩唐書廣德元年九月懷恩拒命于汾州其子瑒進攻榆次未幾為帳下所殺懷恩遂渡河北走靈武

張載詩盜賊如豺虎左傳易子而食析骸而爨

潘岳詩崇芒鬱嵯峨國策注西周王城今河南東

周成周今洛陽鮑照詩客行惜日月崩波南宮吾

不可留○此段言道路之難而唐往來也

故人白馬金盤陀。雄筆映千古。見賢心匪他。念子善

杜田正

師事。歲寒守舊柯。為我謝賈公。病肺臥江沱。杜田正

尚書百官府曰南宮蓋取象天官書南宮朱鳥後漢書鄭弘為尚書令前後所陳補益王政者著之南宮

以為故事南宮猶言南省舊注專謂禮部非也盧諶賈逵為禮部侍郎常乘白馬故于賈至亦云

詩網繆委心自同匪他南史孔休源人倫儀表當師事之鮑令暉詩終身執此調歲寒心不改潘岳

詩不見山下松隆冬不易故不見澗底栢歲寒守一度此語意言賈素愛才唐當始終師事史記伍子胥曰為我謝申包胥病肺公自謂○此段敘賈侍郎而以寄字作結

寄董卿嘉榮十韻

聞道君牙帳。防秋近赤霄。下臨千仞雪。却背五繩橋。
 海內久戎服。京師今晏朝。犬羊曾爛熳。宮闕尚蕭條。
 猛將宜嘗胆。龍泉必在腰。黃圖遭污辱。月窟可焚燒。
 會取干戈利。無令斥候驕。居然雙捕虜。自是一嫖姚。
 落日思輕騎。高秋憶射鵰。雲臺畫形像。皆為掃氛妖。

元帥建牙旗于帳前謂之牙帳 近赤霄言西山三城之高 廣德元年冬吐蕃陷京師 吳越春秋采葛婦歌嘗膽不苦其如飴 哀江南賦擁狼望于黃圖 黃圖圖地形以黃也 西域傳斥候百人五分之擊刁斗自衛 後漢馬武傳建武四年武與虎牙將軍蓋延等討劉永拜捕虜將軍 北齊書斛律光

嘗射一大鳥正中其頭形如車輪旋轉而下乃鵬也
 邢子高嘆曰此射鵬手時號為落鵬都督○首四句
 敘董卿防秋之地次四句時事次八句勉而
 期之之詞落日四句寄懷而以期望作結

立秋雨院中有作

院中節度使府署

山雲行絕塞。大火復西流。飛雨動華屋。蕭蕭梁棟秋。
 窮途愧知己。暮齒借前籌。已費清晨謁。那成長者謀。
 解衣開北戶。高枕對南樓。樹濕風涼進。江喧水氣浮。
 禮寬心有適。節爽病微瘳。主將歸調鼎。吾還訪舊丘。

詩七月流火注大火心星也七月則此星西流 留侯世家臣請借前箸為大王籌之 魏知己嚴武表薦也借前籌參謀也雖費清晨之謁而不能為長者成謀自謙語長者謂嚴武 禮寬即自識將軍禮數

寬意漢官儀三台助鼎調味牛弘食舉歌鹽梅既濟鼎鉉調舊丘指長安故丘○首四句了題次四句院中情次四句院中雨後景事末則言嚴之相得甚歡而欲攜歸舊居也

奉和嚴鄭公軍城早秋

秋風嫋嫋動高旌。玉帳分弓射虜營。已收滴博雲間

戍。欲奪蓬婆雪外城。九歌嫋嫋兮秋風困學紀聞

州城四面險阻易于固守有安戎江蓬婆水在州南三十里舊書作蒲婆嶺其地在雪山外○已收句已

軍城早秋

昨夜秋風入漢關。朔雲邊雪滿西山。更催飛將追驕

虜。莫遣沙場匹馬還。雪一作月○公羊傳匹馬隻輪無返者嚴武傳廣德二年九

月破吐蕃七萬餘衆板當狗城遂收鹽川城通鑑武以崔旰為漢州刺史使將兵擊吐蕃于西山連拔其城攘地數百里

院中晚晴懷西郭茅舍

卽浣花草堂

幕府秋風日夜清。澹雲疎雨過高城。葉心朱實看時

落。階面青苔先自生。復有樓臺銜暮景。不勞鐘鼓報

新晴。浣花溪裏花饒笑。肯信吾兼吏隱名。曹植橘賦朱實不萌

馬得素榮劉琨詩朱實隕勁風舊注俗以鐘鼓聲亮為晴之占故日報新晴唐太宗詩笑樹花分色○前六院中晚晴末聯懷西郭茅舍

〔張璠曰〕詳此詩見公不樂居幕府明年正月遂歸草堂

到村

碧澗雖多雨。秋沙先少泥。蛟龍引子過。荷芰逐花低。
老去參戎幕。歸來散馬蹄。稻梁須就列。榛草即相迷。
蓄積思江漢。頑疎惑町畦。暫酬知己分。還入故林棲。

村雨

町音挺。○〔西京雜記〕瓠子河決有蛟龍從九子自決中逆上入河噴沫流波數十里。〔史〕蔡澤傳力田蓄積。〔王濬自理表〕而以頑疎舉措失宜。〔莊子〕彼且為町畦亦與之為町畦。知已分謂嚴武表薦。○是時公居幕府暫到西村草堂末句與上首同意

雨聲傳兩夜。寒事颯高秋。挈帶看朱紱。開箱覩黑裘。
世情只益睡。盜賊敢忘憂。松菊新霑洗。茅齋慰遠游。

時公為尚書員外郎服緋魚故用赤紱。○公到村值雨而作故末語云茅齋慰遠游

宿府

清秋幕府井梧寒。獨宿江城蠟炬殘。末夜角聲悲自語。
中天月色好誰看。風塵荏苒音書絕。關塞蕭條行路難。
已忍伶俜十年事。強移棲息一枝安。

合

〔梁武帝詩〕秋月出中天

〔張華詩〕荏苒日月

〔庾肩吾詩〕井梧生未

〔庾信詩〕音書兩俱絕

〔胡笳關山修阻兮行路難

古猛虎行。伶俜到他鄉。○前四宿府之事後四句宿府之情。永夜角聲二句上五字微讀

遣悶奉呈嚴公二十韻

白水魚竿客。清秋鶴髮翁。胡為來幕下。祇合在舟中。

後漢趙典傳贊大儀鶴髮庾信賦予老矣鶴髮雞皮。此詩公不樂居幕府而作四句總領起黃卷

真如律。青袍也自公。老妻憂坐痺。幼女問頭風。平地

專欹倒。分曹失異同。禮甘衰力就。義忝上官通。唐會要天

寶四載十一月勅御史依舊置黃卷書闕失每歲委知雜御史長官比類能否送中書門下改轉日褒貶

儒林傳他如律唐志尚書員外郎從六品上上元元年制五品服淺緋六品服深綠公時已賜緋

而云青袍者在幕府故耳舊注謂青袍九品服誤矣詩自公退食真如律也自公言未免為官守

所拘坐痺頭風言多疾專欹倒失異同言衰躓禮甘二句一氣言我之衰力如此而甘就列者以義

與上官通好也上官謂嚴武此段敘不堪任職情狀疇昔論詩早。光輝仗鉞

雄寬容。存性拙。剪拂念途窮。廣絕交論剪拂使其長鳴。此段承上官通來

言武待公之厚露裛思藤架。烟霏想桂叢。信然龜觸網。直作

鳥窺籠。西嶺紆村北。南江繞舍東。竹皮寒舊翠。椒實

雨新紅。浪歛船應杓。杯乾甕即空。籬籬生野徑。斤斧

任樵童。淮南小山桂樹叢生兮山之幽史龜策傳龜使抵網而遭漁者得之齊書劉善明謂

沈攸之曰此已籠之鳥耳詩椒聊之實藩籬二句言草堂不至而荒。此段皆懷草堂景物惟觸網

窺籠二句言在幕府之拘束縛酬知己。蹉跎效小忠。周防期稍稍。

太簡遂匆匆。曉入朱扉啓。昏歸畫角終。不成尋別業。

未敢息微躬。烏鵲愁銀漢。駑駘怕錦幪。會希全物色。

時放倚梧桐。說苑鮑叔奉酒而起曰祝在君無忘其出而在莒也使管仲無忘其束縛而從

容也。世說周處曰年以蹉跎終無所成劉琨詩

日殫效忠飛聲有漢。石崇思歸引肥遯于河陽別

業。沈約詩遇可淹留處便欲息微躬莊子倚樹

而吟據槁梧而瞑。○此段申明先所以就幕而終不

欲之意。語意謂不辭束縛以酬知己之情者與惟

蹉跎以效小忠耳。周防稍稍縱少寬于禮法之外而

生性太簡尚覺匆匆失意耳。所以然者奔走不間于

晨夕是以不得歸草堂而少息勞動也。然而銀漢迢

遙非烏鵲所能填錦幪雖寵非駑駘所樂覆

唯望全其物色使得逍遙自適耳。語甚曲折

送舍弟頴赴齊州三首

頴一作穎

岷嶺南蠻北。徐關東海西。此行何日到。送汝萬行啼。

絕域惟高枕。清風獨杖藜。危時暫相見。衰白意都迷。

前四句送弟後四句自謂

風塵暗不開。汝去幾時來。兄弟分離苦。形容老病催。

江通一柱觀。日落望鄉臺。客意長東北。齊州安在哉。

一柱觀荊州頴所經望鄉臺蜀地公所居

諸姑今海畔。兩弟亦山東。去傍干戈竟。來看道路通。

短衣防戰地。匹馬逐秋風。莫作俱流落。長瞻碣石鴻。

公范陽太君靈氏墓志太君二女一適京兆王佑一適會稽賀馮

胡服士皆短衣淮南子遇歸雁于碣石廣絕交論

軼歸鴻于碣石頴之去為訪親也故此首點明之

去傍句言其去也來看句異其歸也
碣石點明山東鴻雁以此兄弟耳

嚴鄭公堦下新松得霑字

弱質豈自負。移根方爾瞻。細聲侵玉帳。疎翠近珠簾。
未見紫烟集。虛蒙清露霑。何當一百丈。欹蓋擁高簷。

梁武帝詩。瑤臺含碧霧。羅幕生紫烟。○詩意若自寓。

嚴鄭公宅同詠竹字得香字

綠竹半含籜。新梢纔出墻。色侵書帙晚。陰過酒樽涼。
雨洗娟娟淨。風吹細細香。但令無剪伐。會見拂雲長。

晚秋陪嚴鄭公摩訶池泛舟得溪字

元和郡國志摩

訶池在州城西。通鑑注。成都記云。摩訶池在張儀子城內。隋蜀王秀取土築廣子城。因為池。有胡僧見之。曰。摩訶宮毗羅蓋。胡僧謂摩訶為大宮。毗羅為龍。謂此池廣大有龍。因名摩訶池。

湍駛風醒酒。船回霧起堤。高城秋自落。雜樹晚相迷。
坐觸鴛鴦起。巢傾翡翠低。莫須驚白鷺。為伴宿青溪。

謝玄暉詩。汗眼起雜樹。

奉觀嚴鄭公廳事岷山沱江畫圖十韻得忘

字

沱水臨中坐。岷山到北堂。白波吹粉壁。青嶂插雕梁。

直訝松杉冷。兼疑菱荇香。雪雲虛點綴。沙草得微茫。
 嶺雁隨毫末。川蜺飲練光。霏紅洲蕊亂。拂黛石蘿長。
 暗谷非關雨。丹楓不為霜。秋城玄圃外。景物洞庭旁。
 繪事功殊絕。幽襟興激昂。從來謝太傅。丘壑道難忘。

莊子白波若山。劉歆甘泉賦芙蓉菡萏菱荇蘋蘩。西京雜記雪雲曰同雲。晉書謝韶傳夜月明淨。王道子嘆以為佳。謝重曰不如微雲點綴。沈佺期詩暗谷疑風雨。謝靈運詩晚霜楓葉丹。謝安傳安放情丘壑。雖受朝寄。然東山之志。始末不渝。卒贈太傅。此詩以山水雙起。語語分配。到底末聯。以謝安比鄭公。作結。

初冬

垂老戎衣窄。歸休寒色深。漁舟上急水。獵火著高林。
 日有習池醉。愁來梁父吟。干戈未偃息。出處遂何心。

隋蘇子卿詩鋒劍但須利戎衣不
 畏窄。○時公自嚴武幕府歸草堂

觀李固請司馬弟山水圖三首

簡易高人意。匡床竹火爐。寒天留遠客。碧海掛新圖。
 雖對連山好。貪看絕島孤。羣仙不愁思。冉冉下蓬壺。

劉向傳向為人簡易無威儀廉靜樂道不交接世俗
 張衡同聲歌思為莞蒹席在下蔽匡牀。○海中有山
 可依曰島。切題中水字不愁
 思逍遙物外也。亦圖中所有。

方丈渾連水。天台總映雲。人間常見畫。老去恨空聞。

范蠡舟偏小。王喬鶴不羣。此生隨萬物。何處出塵氛。

天台賦涉海則有方丈蓬萊登陸則有四明天台
又王喬控鶴以冲天 趙曰圖必畫舟與鶴故云然

○首聯畫領聯情頸
聯畫末聯情又一格

高浪垂翻屋。崩崖欲壓床。野橋分子細。沙岸繞微茫。

紅浸珊瑚短。青懸薜荔長。浮查竝坐得。仙老暫相將。

拾遺記堯時有巨查浮于西海其上有光若星月常
繞四海十二年一周名貫月查又名挂星查羽人棲

息其上 謝惠連詩竝坐相招邀 簡文帝詩相將
渡江口 前六句平分山水末聯即畫而寄情游仙

至後

冬至至後日初長。遠在劍南思洛陽。青袍白馬有何

意。金谷銅駝非故鄉。梅花欲開不自覺。棣萼一別未

相望。愁極本憑詩興遣。詩成吟味轉淒涼。

如此 水經注金谷水出河南太白原東南流歷金
谷謂之金谷水經石崇故居 陸機洛陽記漢鑄銅

駝二枚在宮南四會道頭夾路
相對 棣萼一別指頰往齊州

懷舊

地下蘇司業。情親獨有君。那因喪亂後。便作死生分。

老罷知明鏡。歸來望白雲。自從失詞伯。不復更論文。

原註公前名預避
御諱改名源明

哭台州鄭司戶蘇少監 崔曰鄭虔蘇源
明相繼而亡

故舊誰憐我。平生鄭與蘇。存亡不重見。喪亂獨前途。
 豪俊何人在。文章掃地無。羈遊萬里闊。凶問一年俱。
 白日中原上。清秋大海隅。夜臺當北斗。泉路着東吳。
 得罪台州去。時危棄碩儒。移官蓬閣後。穀賤歿潛夫。
 流慟嗟何及。銜冤有是夫。〔任昉策文〕衣冠禮樂掃地無餘。〔魏志〕蜀黃權軍敗降魏蜀先主凶問至群臣咸賀惟權獨否。〔陸雲傳〕凶問卒至痛心催剝。〔阮瑀詩〕冥冥九泉室漫漫長夜臺。〔北〕斗蓬閣承中原指蘇東吳台州承海隅指鄭穀貴句廣德二年蘇鄭皆以是年歿詳八哀詩注。
 ○首八句總起下敘死亡之由。得罪四句謂之扇對格排律中變體不可不識。
 道消詩發興心息酒為徒。許與才雖薄。追隨跡未拘。班揚名甚

盛嵇阮逸相須。

〔易〕否君子道消。〔謝靈運詩〕道消結憤懣。才雖薄公自謂。跡未拘趨于

形跡之外即忘形交也。班揚指蘇鄭嵇。阮公與蘇鄭合敘。○此段敘相與之情。會取君臣合

寧詮品命殊。賢良不必展。廊廟偶然趨。勝決風塵際。

功安造化鑪。從容詢舊學。慘澹閱陰符。擺落嫌疑久。

哀傷志力輸。

〔莊子〕以天地為大鑪造化為大冶。說命台小子舊學于其盤。〔戰國策〕蘇秦

游說六國不遇而返。乃夜發書得太公陰符之謀而頌之。詢舊學指蘇嘗為論德司業閱陰符指鄭嘗

著兵法諸書。嫌疑指鄭受僞命遭貶志。力輸指蘇少監散職。○此段嘆其淪落。俗依綿谷

異。客對雪山孤。童稚思諸子。交朋列友于。情乖清酒

送。望絕撫墳呼。瘡病餐巴水。瘡痍老蜀都。飄零迷哭

處。天地日榛蕪。

諸子指蘇鄭之子。列友于即異姓。篤天倫意。○此段自傷述致哭之情。

正月三日歸溪上有作簡院內諸公

野外堂依竹籬邊水向城。蟻浮仍臘味。鷗泛已春聲。
藥許隣人斲書從稚子。擎白頭趨幕府深。覺負平生

七啓浮蟻鼎沸酷烈馨香。庾信詩浮蟻對春開。○鶴曰時公自嚴武幕中歸浣花溪。

獨坐

悲秋回白首。倚杖背孤城。江歛洲渚出。天虛風物清。
滄浪恨衰謝。朱紱負平生。仰羨黃昏鳥。投林羽翮輕。

敝廬遣興奉寄嚴公

野水平橋路。春沙映竹村。風輕粉蝶喜。花煖蜜蜂喧。
把酒宜深酌。題詩好細論。府中瞻暇日。江上憶詞源。
跡寄朝廷舊。情依節制尊。還思長者轍。恐避席為門。

詞源謂嚴公時尹成都節度兩川。陳平傳家貧以席為門。然門外多長者車轍。○前六句敝廬遣興後段寄嚴公。

營屋

我有陰江竹。能令朱夏寒。陰通積水內。高入浮雲端。
甚疑鬼物憑。不顧剪伐殘。東偏若面勢。戶牖未可安。
愛惜已六載。茲晨去千竿。蕭蕭見白日。洶洶開奔湍。

度堂匪華麗。養拙異考槃。草茅雖薙茸。衰疾方少寬。洗然順所適。此足代加餐。寂無斧斤響。庶遂憇息歡。

公自上元元年營草堂至永泰元年六載 [曹植詩

岩析苦崩缺湖水何洶洶] [考工記室中度以几堂

上度以筵] [詩考槃在澗碩人之寬] [注考成也槃樂

也] [潘岳傳] 吾子洗然恬憺自逸 無斧斤響言茅

茨不剪椽柱不斷 ○前段至洶洶開奔湍言

伐竹以為營屋之由下則敘營屋之深意也

除草

原注去蕪草也蕪音潛 ○益州方物贊

蜂螫人以溺灌之即解莖有刺葉或

青或紫善治風腫考杜詩當作蕪

草有害於人。曾何生阻修。其毒甚蜂蠆。其多彌道周。清晨步前林。江色未散憂。芒刺在我眼。焉能待高秋。

霜露一霑凝。蕪葉亦難留。荷鋤先童稚。日入仍討求。

轉致水中央。豈無雙釣舟。頑根易滋蔓。敢使依舊丘。

自茲藩籬曠。更覺松竹幽。芟夷不可闕。疾惡信如仇。

左傳臧文仲曰蜂蠆有毒而况國乎 [趙曰待秋時

霜露沾而方去則蕪葉與蕪草美惡無辨矣見去之

不可不速] [陶潛詩] 荷鋤稚子倦 [詩] 宛在水中央

雙釣舟以釣舟載而致之水中無俾遺種也 [左

傳] 疾惡如仇若農夫之去草芟夷蘊崇之絕其本根

勿使能植則善者信矣 ○自首至蕪葉亦難留敘除

草之由荷鋤到敢使依舊丘除草之

事末段推一意作結正意旁意俱出

春日江村五首

農務村村急。春流岸岸深。乾坤萬里眼。時序百年心。

茅屋還堪賦。桃源自可尋。艱難昧生理。飄泊到如今。
陶潛詩農務各自歸。按春日江村因江村春日而起興。俱推開寫情事。不必沾沾江村也。其中或點江村或點春日。須善領略。

迢遞來三蜀。蹉跎有六年。客身逢故舊。發興自林泉。
過懶從衣結。頻遊任履穿。籬籬無限景。恣意買江天。

莊子原憲衣弊履穿

種竹交加翠。栽桃爛熳紅。經心石鏡月。到面雪山風。
赤管隨王命。銀章付老翁。豈知牙齒落。名玷薦賢中。

高唐賦交加累積重疊增益。劉孝綽詩堂皇更隱。曠松灌雜交加。漢官儀尚書令僕丞郎月給赤管

大筆一雙椽。題曰北宮著作。漢百官表凡吏秩比

二千石以上皆銀印青綬。注漢舊儀云銀印背龜紐

其文曰章謂刻曰某官之章也。唐時無賜印者公

謂銀章特指魚袋而言耳。陳平傳吾聞薦賢蒙上

賞非魏無知無以至此。此指嚴公。前

四敘草堂之勝亦足自娛。起下為郎之悞。

扶病垂朱紋。歸休步紫苔。郊扉存晚計。幕府愧羣材。

燕外晴絲卷。鷗邊水葉開。鄰家送魚鱉。問我數能來。

韋賢傳黼衣朱紱。洙曰紱古蔽膝也。象冕服以韋為

之。白居易傳居易早年歸休。沈約詩客位紫苔

生。阮籍詩浴鷗開

水葉戲蝶避風絲

羣盜哀王粲。中年名賈生。登樓初有作。前席竟為榮。

宅入先賢傳。才高處士名。異時懷二子。春日復含情。

王粲七哀詩西京亂無象豺虎方遘患良曰豺虎喻
群盜也潘岳夏侯湛諫中年隕卒漢書註異時
往時也○此輓輻格也前六句叠叠申上末句總承
寄慨朱長孺云公依嚴武似王粲在荊州官幕僚
似賈生為王傅故此詩
以二子自况因以自悲

春遠

蕭蕭花絮晚。菲菲紅素輕。日長唯鳥雀。春遠獨柴荆。
數有關中亂。何曾劍外清。故鄉歸未得。地入亞夫營。

本草柳花一名絮唐書廣德二年十月僕固懷恩
誘吐蕃回紇入寇十一月吐蕃遁去永泰元年二月
党項寇富平富平屬京兆府故曰數有關
中亂○前四景後四情未聯承關中亂來

絕句三首

聞道巴山裏。春船正好行。都將百年興。一望九江城。

此首公蓋欲
游荆楚而作

水檻溫江口。茅堂石筍西。移船先主廟。洗藥浣花溪。

唐書溫江縣屬成都府○此首
不得即去而更為游覽之事

謾道春來好。狂風大放顛。吹花隨水去。翻却釣魚船。

首句照第一首春船正好行句見其不然也○按三
首公欲下荆楚之作但着船字作眼第一首傳言春
水方平可以放船荆楚也次首言其不得即去但可
移船先主之廟而洗藥浣花之溪末首言風之狂釣
船且為之翻恐其終
不得去也細玩自見

絕句六首

日出籬東水。雲生舍北泥。竹高鳴翡翠。沙僻舞鷓鴣。

上林賦注。鷓鴣黃白色。長頸赤喙。○六首俱散咏春暮之作。

藹藹花蕊亂。飛飛蜂蝶多。幽棲身懶動。客至欲如何。

此春嬾之作

鑿井交櫻葉。開渠斷竹根。扁舟輕裊纜。小徑曲通村。

吳若本注。交櫻卽井綆也。

急雨捎溪足。斜暉轉樹腰。隔巢黃鳥竝。翻藻白魚跳。

終軍傳。白魚登舟。

舍下筍穿壁。庭中藤刺簷。地晴絲冉冉。江白草纖纖。

晉書。顧榮苦志讀書。經年不出戶。村居疎陋。竹筍穿壁。○首二句近景。後二句遠景。晴絲白草。本相屬而故作地晴。

江白一讀。

江動月移石。溪虛雲傍花。鳥棲知故道。帆過宿誰家。

此首春夜作。

絕句四首

堂西長筍別開門。塹北行椒却背村。梅熟許同朱老

吃。松高擬對阮生論。原注。朱阮劍外相知。○行椒。椒之成行者。懷舊賦。列列行椒。

欲作魚梁雲覆湍。因驚四月雨聲寒。青溪先有蛟龍

窟。竹石如山不敢安。趙曰。魚梁乃傍竹。積石橫截中流。以取魚者。因溪下有蛟龍時。

木言會科

興雲雨故未敢安也

兩箇黃鸝鳴翠柳一行白鷺上青天

雪門泊東吳萬里船范成大吳船錄蜀人入吳者皆從合江亭登舟其西則萬里橋

杜詩門泊東吳萬里船此橋正為吳人而設

藥條藥甲潤青青色過棕亭入草亭

響根居隙地怯成形苗根承上藥條藥甲來成形如人參象人茯苓如飛鳥類

喜雨

南國早無雨今朝江出雲入空纔漠漠灑迥已紛紛

巢燕高飛盡林花潤色分曉來聲不絕應得夜深聞

早一作旱○禮記天降時雨山川出雲

天邊行

天邊老人歸未得日暮東臨大江哭隴右河源不種

田胡騎羌兵入巴蜀洪濤滔天風拔木前飛秃鵝後

鴻鵠九度附書向洛陽十年骨肉無消息舊唐書上元年後隴

西河西郡盡陷吐蕃書浩浩滔天史永泰元年三月大風拔木公蓋紀實也

莫相疑行

男兒生無所成頭皓白牙齒欲落真可惜憶獻三賦

蓬萊宮自怪一日聲輝赫集賢學士如堵墻觀我落

筆中書堂往時文采動人主此日飢寒趨路旁晚將末契託年少當面輸心背面笑寄謝悠悠世上兒莫

爭好惡莫相疑李陵書男兒無所成名禮記孔子射于矍相之圃觀者如堵墻季華

中書政事堂記武德以來于門下省議事謂之政事

堂高宗光宅元年裴炎自侍中除中書令執宰相筆

乃遷政事堂于中書省本傳甫獻三大禮

賦帝奇之使待制集賢院命宰相試文章

赤霄行七命掛歸翮于赤霄之表

孔雀未知牛有角渴飲寒泉逢舐觸赤霄玄圃須往

來翠尾金花不辭辱江中淘河嚇飛燕銜泥却落羞

華屋皇孫猶曾蓮勺困衛莊見貶傷其足老翁慎莫

怪少年葛亮貴和書有篇丈夫垂名動萬年記憶細

故非高賢衛當作鮑物志孔雀尾多變色或紅或黃如雲霞無

定人採其尾有金翠爾雅鶉鶉鶉注今之鶉鴝也

好羣飛入水食魚故名鶉鶉俗呼為陶河莊子鴟

得腐鼠鷓鴣過之仰而視之曰嚇注嚇怒而拒物聲

漢宣帝紀帝初為皇曾孫喜游俠常困于蓮勺鹵

中如淳曰為人所困辱也蓮勺縣有鹽池縱橫十餘

里鄉人名為鹵中蓮音輦左傳齊國子相靈公以

會高鮑處守及還孟子勸之曰高鮑將不納君秋則

鮑牽而逐高無咎仲尼曰鮑莊子之智不如蔡蔡猶

能衛其足注蔡傾葉向日以蔽其根諸葛亮傳陳

壽所上諸葛亮集目錄凡二十四篇貴和第十一

阮藉咏懷細故何足慮高度跨一世此遭侮而感

嘆之作與上首同時前三段俱比喻引起言困辱固

所不辭至老翁以下則又犯而不校矣陶河

與牛為類比惡少飛燕與孔雀為類比高潔

三韻三首

高馬勿捶面。長魚無損鱗。辱馬馬尾焦。困魚魚有神。

君看磊落士。不肯易其身。此作見士有不可辱之節

蕩蕩萬斛船。影若揚白虹。起檣必椎牛。挂席集眾功。

自非風動天。莫置大水中。顏氏家訓昔在江南不信有千人氍帳及來河北不

信有二萬斛船。此詩見大受不可小知意

烈士畏多門。小人自同調。名利苟可取。殺身傍權要。

何當官曹清。爾輩堪一笑。世說王緒王國寶相為唇齒上下權要。此為小人

樹黨附和而作

卷終

高馬勿揮面長魚無損發碎馬馬尾係困臥魚有

若看紅落士不肯易其身此作見士肯

鴻鴻萬斛船影若揚白虹起橋必甚生控南集眾的

白井風動天莫置大水中

谷有二世解船此詩

見大受不河此詩

烈士畏多門小人自同調名利苟可取殺身傍

何當官曹清濁兼堪一笑世世上下世世

何當官曹清濁兼堪一笑世世上下世世

何當官曹清濁兼堪一笑世世上下世世

何當官曹清濁兼堪一笑世世上下世世

何當官曹清濁兼堪一笑世世上下世世

何當官曹清濁兼堪一笑世世上下世世

何當官曹清濁兼堪一笑世世上下世世

何當官曹清濁兼堪一笑世世上下世世

何當官曹清濁兼堪一笑世世上下世世

何當官曹清濁兼堪一笑世世上下世世

何當官曹清濁兼堪一笑世世上下世世

